

Historikertranskription

{1} Je Symons de Wermeranges chivailliers fas savoir et congissant à tous que je ai repris en fielz et an hommaige de {2} monsignor Joffroit sires de Boulay chivailliers cent sodées de terre à messains lesqueilles j'ai asseneit sus tout ceu {3} que j'ai, puix et doi avoir à Ganquierkes on ban et as esbandisses con apellet Hommertanges et ancor por muelz {4} parfaire les cent sodées de terre desus dites sus deiz quartes de wain et sus deiz quartes d'avainne que je {5} assies et assige sus mon mollin à Wermeranges. Et cest assenemant ai-je fait por cent livres de boins petis {6} tornois que je ai resut dou dit signor Joffroit et dont il m'ait fait boin paiemant et les ai tous mis an mon {7} proffit. Et ces dites cent sodées de terre ting je an fielz dou dit signor Joffrait et an suis devenus ces hons et {8} anci lou doivent mi hoirs devenir après mon decept ce de moi defailloit à lui et à ces hoirs à tous jours maix. Et {9} an doie je et mi hoirs après moi venant chacun an treze semmaine la warde à Boulay. Et se je ne faisoie la {10} warde chacun an anci con devant est dis ou mi hoirs ce de moi defailloit li sires Joffrois ou sui hoirs poroient {11} alleir à devant dit assenemant com à lour prope eritaige tant que je ou mi hoirs averiens fait la warde an ci {12} con devant est dis. Et por ceu que ce soit ferme chose et estable ai-je prieit et requis à religiouze persolne mon {13} chier et ameit signor Jehan par la pacience de Deu albés de Saint-Avol en l'aveschiet de Mes que il, en tesmoignaige {14} de ces choses voillet metre son saiel an ces presentes lettres avoques le mien. Et je Jehans par la pacience de Deu albés {15} desus nommeis à la priere et à la requeste dou dit signor Symon mon homme et mon fiable ai mis mon saiel en ces pre- {16} sentes lettres avoques lou sien en tesmoignaige de veriteit que furent faites l'an de grace nostre signor mil trois {17} cens et quinze ans